

Je fu en fleur ou temps passé d'enfance

Et puis après devins fruit en jeunesse ;
Lors m'abaty de l'arbre de plaisance,
Vert et non meur (1), Folie ma maistresse.
Et pour cela Raison, qui tout redresse
A son plaisir, sans tort ou mesprison (2),
M'a a bon droit, par sa tresgrant sagesse.
Mis pour meurir ou feurre de prison (3).

En ce j'ay fait longue continuance,
Sans estre mis a l'essor de largesse ;
J'en suy contant et tiens que, sans doubance,
C'est pour le mieulx, combien que par peresse
Deviens fletry et tire vers vieillesse.
Assez estaint est en moy le tison
De sot desir, puis qu'ay esté en presse (4)
Mis pour meurir ou feurre de prison.

Dieu nous doint paix, car c'est ma desirance !
Adonc seray en l'eau de liesse
Tost refreschi et, au soleil de France,
Bien nettié du moisy de tristesse.
J'attens bon temps, endurant en humblesse,
Car j'ay espoir que Dieu ma guerison
Ordonnera ; pource m'a sa haultesse

Mis pour meurir ou feurre de prison.

ENVOI

Fruit suis d'yver qui a meins de tendresse

Que fruit d'esté ; si suis en garnison

Pour amolir ma trop verde duresse,

Mis pour meurir ou feurre de prison.

1. Meur : Mûr. 2. Mesprison : Injustice. 3. Feurre de prison : Pour mûrir sur la paille de la prison. 4. En presse : Enfermé.

Charles d'Orléans (1394–1465)